

KEMURIDAN: DIPANGGIL, DIPILIH, DIUTUS
APRIL 2014
TEMA: DIPANGGIL KEPADA KEHIDUPAN BARU

Fokus: Yesus memanggil kita agar kita dapat mengalami kehidupan baru yang hanya Dia yang dapat berikan. Panggilan kepada kehidupan baru ini merupakan 'kelahiran melalui roh Allah'. Kelahiran baru dalam Kristus inilah yang menyucikan dan mengubah hati dan minda kita.

Lagu Pembukaan: JADILAH SAKSI KRISTUS

Setelah dirimu dis'lamatkan, jadilah saksi Kristus
Cahaya hatimu jadi terang, jadilah saksi Kristus
Tujuan hidupmu jadi nyata, jadilah saksi Kristus

Setelah dirimu kau tinggalkan, jadilah saksi Kristus
Kehidupan baru kau dapatkan, jadilah saksi Kristus
Api cinta Kristus kau kobarkan, jadilah saksi Kristus

Di saat hatimu jadi hampa, jadilah saksi Kristus
Tiada hasratmu dalam karya, jadilah saksi Kristus
Tiada harapan kan berjuang, jadilah saksi Kristus

Doa Pembukaan: (Dijemput seseorang untuk memimpin kita dalam doa pembukaan untuk menjemput Yesus di tengah kita).

MELIHAT KEPADA KEHIDUPAN

Elaine sentiasa merasakan dirinya sebagai seorang yang dirahmati; mempunyai seorang suami yang penyayang, dua orang anak yang comel dan kehidupan yang cukup selesa. Seluruh hidupnya difokuskan kepada keluarganya, memastikan segala keperluan mereka dipenuhi dan sentiasa berada di sisi mereka. Dia menghantar anak-anaknya mengikuti aktiviti ko-kurikulum di sekolah mereka, kelas-kelas tuisyen dan pelbagai aktiviti lain dengan tujuan menyediakan pendidikan yang menyeluruh bagi mereka.

Pada setiap hujung minggu, Elaine memastikan anak-anaknya menghadiri kelas Katekisme pada hari Ahad, menghadiri Misa Kudus dan meluangkan masa bersama keluarga. Masa kian berlalu; kehidupan Elaine menjadi rutin dan menjadi terlalu biasa dan Elaine hilang keghairahan hidup.

Pada suatu hujung minggu, dia telah diajak oleh teman-temannya untuk menghadiri satu retret hening yang diadakan di Gereja Paroki. Semasa retret tersebut, Elaine meluangkan masa hening yang sangat bernilai dengan Tuhan apabila kuasa Roh Kudus membuka matanya

dan dia merasakan sentuhan-Nya yang begitu mendalam. Selepas pengalaman itu, Elaine mula menyelami Kitab Suci pada setiap hari dan juga membaca buku-buku rohani. Dia tidak lagi hidup hanya untuk keluarga semata-mata. Dia telah memperbaharui komitmennya terhadap KED; malah telah menawarkan diri untuk melayani dalam gereja.

Kehidupan Elaine yang baru ini telah menyentuh hati ahli keluarganya dan mendorong mereka untuk turut keluar dari zon keselesaan hidup yang mereka rasakan selama ini. Mereka kini bersama-sama melayani Tuhan. Sesungguhnya, Elaine telah dipanggil kepada suatu kehidupan baru.

Renungan

- Kongsikan satu pengalaman bagaimana anda merasakan sentuhan kuasa Tuhan yang telah mengubah anda. (Kongsikan dalam kumpulan kecil.)

SABDA ALLAH : Yoh 3: 1-7

- Baca petikan sebanyak dua kali.
- Pilih kata atau frasa pendek dari teks tersebut. Ungkapkan dengan suara yang kedengaran dalam suasana doa sebanyak tiga kali dan hening sejenak di antara ungkapan itu.
- Renungkan kata atau frasa pendek yang dipilih dalam keadaan senyap selama dua minit.
- Dalam kumpulan kecil, kongsikan perkataan atau frasa yang menyentuh hati anda.
- Kongsikan juga:
 - Yesus berkata: 'tidak siapa yang dapat masuk ke Kerajaan Allah tanpa dilahirkan baru melalui air dan Roh Kudus'. Dalam cara apakah pernyataan di atas berkait rapat dengan pengalaman Elaine (MELIHAT KEPADA KEHIDUPAN)?
 - Nyatakan tindakan-tindakan yang dapat membantu kita bertumbuh dalam kehidupan baru bersama Yesus dan orang lain.

HIDUP DALAM KASIH

- Dalam kumpulan besar, laporkan inti-inti utama perkongsian dan tindakan yang akan dilakukan.
- Tetapkan tindakan untuk KED kita. Siapa yang akan melakukan Apa, Bila dan Bagaimana?
- Laporkan aktiviti KED sejak pertemuan yang lepas. *(jika ada)*

Doa Penutup

Mintalah setiap anggota KED untuk mendoakan

- keperluan individu, keluarga, KED dan

- perancangan tindakan yang telah dibincangkan.
(dalam kata-kata /bahasa mereka sendiri)

Lagu Penutup : TIADA KU RAGU LAGI

Tiada ku ragu lagi 'tuk mengikutMu Yesus
Tiada ku ragu lagi 'tuk melayaniMu
Walau banyak rintangan
Dan badai pun menerjang
Tiada ku ragu lagi untuk selamanya

Yesus, Yesus ... sahabatku
Penolong dalam hidupku
Ku rindu semua orang mengenal Mu
Engkau jalan kebenaran
Dan memberi hidup yang kekal
Bagi tiap orang yang percaya pada Mu.

Liturgi : Pesta Kebangkitan Tuhan (20 April 2014)